

PREDGOVOR

Ideja o pisanju udžbenika pedijatrije nastala je prije šest godina, u vrijeme intenzivne suradnje katedri za pedijatriju univerziteta u Sarajevu, Banjoj Luci, Tuzli i Mostaru s katedrama za pedijatriju univerziteta u Gentu, Leuvenu i Antwerpenu u Belgiji te Parmu u Italiji, a u okviru Tempus Phare projekta Evropske unije.

Cilj i zadatak ovog projekta bila je reforma kurikuluma predmeta Pedijatrija na univerzitetima u Bosni i Hercegovini uz pomoć i savjete kolega s različitih univerziteta zemalja Europske unije. U toku projekta usvojen je novi kurikulum, koji je usuglašen s kurikulumima u zemljama Europske unije, unaprijeđen je i moderniziran nastavni proces, tako da je gradivo koje studenti u našoj zemlji slušaju na predmetu Pedijatrija kompatibilno s onim koje slušaju njihove kolege u Zapadnoj Europi. Na ovaj način katedre za pedijatriju su se rano uključile u Bolonjski proces.

S obzirom na novi kurikulum, ukazala se potreba za udžbenikom koji bi slijedio njegove smjernice. Tako je nakon duljeg rada i suradnje pedijatara s univerziteta u Sarajevu, Banjoj Luci, Tuzli i Mostaru nastala ova knjiga namijenjena prvenstveno studentima medicine, ali i studentima drugih, srodnih fakulteta.

U pisanju udžbenika sudjelovao je veliki broj autora. Tekstovi nisu jezično usuglašavani, prepušteno je autorima da odluče kojim jezikom narodâ Bosne i Hercegovine će se koristiti. Autori su nastojali prezentirati materijal koji se nadovezuje na predznanje stečeno tokom studija, vode studenta kroz problem na jasan i koncizan način, tako da ga potaknu na logičko razmišljanje a istovremeno da ga ne ostave u dilemi o etiologiji, toku i prognozi pojedinih oboljenja. Udžbenik je dijelom pisan na problemski orijentiran način, što studentu omogućava drugačiji uvid u rješavanje dijagnostičkih problema. Tekst je obogaćen velikim brojem tabela, grafikona i slika koji bi trebali olakšati savladavanje gradiva pedijatrije.

Knjiga "Pedijatrija" je odlukom Senata Univerziteta u Sarajevu proglašena univerzitetskim udžbenikom.

Želja je urednika i autora da udžbenik ispunji cilj; da bude odgovarajuća literatura studentima, da ih na praktičan i jasan način vodi u stjecanju znanja, da im da osnove i pripremi ih za ispunjavanje humanog zadatka - vođenja brige o zdravlju djece.

Sarajevo, 2006.

Urednici